

Tegas tangani penerokaan haram tanpa mengira kaum

Mengecewakan apabila ada segelintir pihak menuduh atau menyindir kerajaan Pahang kononnya 'pilih bulu' dalam kerja penguatkuasaan ke atas tanah diterokai atau dilombong haram di negeri itu.

Dalam soal ini, empat kes yang berlaku wajar diberikan perhatian. Ia membabitkan penerokaan tanah untuk tanaman sayur-sayuran dan bunga-bunga di Sungai Ichat dan Lembah Bertam kedua-duanya di Cameron Highlands, selain penerokaan tanah untuk tanaman durian Musang King di Raub dan terkini, kerja perlombongan emas di Kechau, Lipis.

Dalam keempat-empat kes ini, tidak kira si pelaku itu apa bangsanya sekalipun, pendirian kerajaan negeri yang salah tetap salah.

Susulan itu, kerja penguatkuasaan digerakkan dan seperti dijangka mendapat bantahan pelaku terbabit. Mereka meraih simpati hinggalah ada parti politik tertentu mula campur tangan.

Pada awal kerja penguatkuasaan di Sungai Ichat misalnya, bantahan dalam pelbagai bentuk diterima kerajaan negeri termasuk isunya dibawa ke mahkamah. Namun akhirnya, mereka sendiri menarik kembali kes itu.

Disebabkan ketegasan kerajaan negeri secara konsisten, kerja penguatkuasaan akhirnya berjaya.

Bukan hanya kebun haram dimusnahkan, sebaliknya kawasan yang sensitif kepada alam sekitar, ditanam semula dengan pokok hutan.

Air sungai tercemar teruk sehingga tahap 4 di situ, berjaya dijernihkan hingga ke tahap 1, seterusnya kembali sebagai sumber utama pembekalan air mentah yang diproses menjadi air terawat, bagi menampung keperluan sebahagian besar penduduk kawasan Cameron Highlands.

Penguatkuasaan di Lembah Bertam pula berjalan lancar tanpa sebarang insiden buruk. Mungkin pelaku belajar daripada kegagalan bantahan di

Sungai Ichat.

Di Raub pula, corak bantahan hampir sama dengan di Sungai Ichat. Bantahan menerusi pembawaan kes ke mahkamah dan secara fizikal, turut disertai ahli politik pembangkang.

Sungguhpun akhir tahun lalu Mahkamah Tinggi Kuantan menolak permohonan mendapatkan semakan kehakiman terhadap notis arahan pengosongan tanah, namun mereka membuat rayuan.

Hasilnya, kerja penguatkuasaan di Raub terpaksa ditangguhkan lagi sehingga kini.

Penangguhan disebabkan keputusan mahkamah dan perjalanan proses undang-undang yang tentunya kerajaan negeri perlu akur dan patuh.

Terkini di Kechau, Lipis. Sungguhpun membabitkan tanah milik sendiri

setiap satu lot dimiliki secara bersama oleh ramai individu menurut bahagian masing-masing.

Tindakan penguatkuasaan serupa diambil kerajaan negeri atas asas undang-undang.

Menurut Seksyen 40 Kanun Tanah Negara, sebarang galian dan bahan batuan terkandung dalam atau atas mana-mana tanah, adalah terletak hak hanya kepada kerajaan negeri.

Oleh itu, menjadi kesalahan jika pengambilan bahan mineral dibuat tanpa kebenaran dan permit daripada kerajaan negeri, lalu mewajarkan kerja penguatkuasaan dilaksanakan.

Sungguhpun kerja penguatkuasaan tanpa mengira batas kaum, kerajaan negeri turut mengemukakan penyelesaian bercirikan 'menang-menang' kepada semua dengan pelantikan agensi

berkaitan kerajaan untuk menyelaraskan kerja supaya pertanian mahupun perlombongan, dijayakan semula dengan lebih sempurna.

Di Sungai Ichat dan Lembah Bertam, Pahang Corporation Sdn Bhd (Pahang Corp) dilantik untuk menyelaras-kannya.

Tugasnya termasuk memastikan kebenaran yang benar-benar 'sahih' diberi kebenaran mengusahakan tanah secara sah di kawasan ditentukan, serta tidak mencemarkan alam sekitar.

Sementara di Raub, tugas penyelarasan diserahkan kepada Perbadanan Kemajuan Pertanian Negeri Pahang (PKPP) yang bekerjasama dengan Royal Pahang Durian Group (RPD Group), membentuk Royal Pahang Durian Produce-PKPP Sdn Bhd (RPDP-PKPP).

Di Kechau, Lipis, Pahang Mining Corporation Sdn Bhd (PMC) yang baru ditubuhkan kerajaan negeri, dipertanggungjawabkan menyelaras kegiatan perlombongan emas di sana.

PMC juga bertanggungjawab melaksanakan Skim Pelombong Kecil (SPK) yang baru diperkenalkan kerajaan negeri, khusus untuk memudahkan cara kerja perlombongan bahan mineral itu bagi tanah sendiri seluas 4.05 hektar dan ke bawah.

Mungkin terdapat perselisihan mengenai beberapa perkara ditetapkan agensi penyelaras berkenaan seperti dilaporkan berlaku di Raub. Namun, sudah pasti ia boleh diselesaikan menerusi meja rundingan.

Hakikatnya, kerajaan negeri secara konsisten tegas dalam kerja penguatkuasaan tanpa mengira kaum, tetapi turut menawarkan penyelesaian kepada isu sama.

Harapannya, semua pihak perlu berlapang dada menjayakannya.

Datuk Abdul Wahab Mohamad Ali,
Kuantan



Tanah hutan simpan di Raub diteroka secara haram untuk tanaman durian Musang King.

(Foto hiasan)